

小謨觴館詩文集

序

太室之山嵩邱之下有謨觴焉蓋上帝之冊府羣真之秘閣
吾不逢仙客不覩異書俯仰世間嘗以爲憾及與君交觀其
所作頓驚癡俗始歎靈奇譬如窺朱鳥之牕中爛然甲帳駕
綵虹於霄半麗矣瓊樓洞庭張樂何有箏笛之音瑤池命宴
故非烟火之食足使江東袁淑賦藏鸚鵡關中庾信詩遜鳴
蟬南城曾燠

詩集序

予與彭子湘涵交十年矣始自卑聞聞其髻穎髦秀駒逸鳳
鸞夙用慕尚塗轍乖分薜蘿淮陰各在羈屑尤君祖望爲書
以通介而相見自後或睽而合率不歷月經時以逮今茲乃
得盡讀其二十年所爲之詩凡若干集若干卷而序之曰湘
涵自少迄壯總十餘稔其所爲以才爲主以古爲程旁午側
出綺組瑰恢珊瑚木難碎不問賈雉裘火錦焚如裂如九機
百鑷五軌六莊虞淵下春迫而逐之山子驟耳駕而先之秦
娥趙女越施漢嬙不遡步幃俠侍妍冶妖姬失氣嫵夫盪魄
嗚咽顛倒莫知其由揆其張弛辭勝於理由立至強悼心亂
慮姦窮旣謝百怪退舍深谷峭壁夷爲唐途方車駟馬憧憧
往來徑寸之珠不易握粟熙熙饑年不羨太牢如暍得陰如

壓得醒疲劇登頓邃宇攸憩其直詞正氣宏辯博議契淵骨
肉徘徊死生婉篤諄復意哀旨深老氓力穡宿將布陣不問
豐凶不憚首級亞旅從令斥堠自遠惟其以理爲主以才爲
輔古設今施宏演澗穆湘涵之所爲又一變而洎乎有成鳴
呼唏哉自念交臂暨於盟心凡所相期曷盡在是由其才氣
壯盛可以陵終轢賈蹕厲建豎海至馴擾真心逢源亦必裨
補風俗理化和平年運而往齒髮各驚齒簡鬢翰銷沈知慧
假道自信詎云本懷徒以術業無殊欣戚不二蓼蟲桂蠹彼
我自知言其苦辛未爲膚受爲述之如此尤君而外勿以示
人嘉慶丙寅八月望日吳江郭麐序

小謨觴館詩文集總目 并自序

幼經遐陬壯慕劬學九流百家恊涉厓略感心發言諸體間
作窮薄寡諧罕事修禪以厠藝林滄海稊粟計古今體詩八
卷詩餘一卷賦序書記碑銘雜文四卷爲初集甘亭居士彭
兆蓀識

詩集

第一卷

樓煩集

第二卷

南鴻集

第三卷

星社集一

第四卷

星社集二

第五卷

傭書集一

第六卷

傭書集二

第七卷

韋杭集

第八卷

觀濤集

詩餘附錄

文集

第一卷

賦

第二卷

序

第三卷

書

第四卷

記碑銘雜文

小謨觴館詩集卷弟一

鎮洋

樓煩集

辛丑迄丁未

山右寧武古樓煩地西極河湟北鄰火節五
門三邊之一也兆蓀象勺之年家君作宰十稔於茲朔
代燕雲還往如織當夫霜月白夜古情鬱震黃塵酒酣
銅斗歌作輒銜其山川學爲賦詠刪十存一戢戢已多
雖操觚率爾而以志少時鴻爪爲勅勒繼聲朔管霜笳
觀者其有星心月口之思乎乾隆丁未陽月上澣甘亭
居士書於樓煩官舍之獲古堂

企喻歌二首

辛丑

男兒一墮地鵠子飛向天身是射生手不求舉力田

易博食肉侯難得可手弓明明天上月不落韞弢中

隴水歌辭二首

舌卷入喉屢陰沍藏胷中斗血風吹不涼
嗚咽嗚咽肝腸斷絕水咽復波腸絕奈何

讀北史六首

十步有一芳何辭間荆棘才人屈城使阨塞自歎邑
翩翩虞公子見笑李文博輕薄少年場長沙不可作
巨倫遇葛榮拙詩以自晦如何沙門標乃坐五言罪
闕佛佛寧校崔公曠代賢從來薄延壽作史論因緣
景仁工八體便足致開府可憐劉孔昭秀才不得舉
黃衫屬兒子力戰不謀身千古求才者荏蒲大有人

詠古九首

蒼鷹本擊惡弱鳥亦驚翔酷吏豈乏效毋乃民氣傷西京傳
民牧邳寧兼龔黃並列有深意得失觀自詳偏哉矯激流威
力資桁楊流弊成鉗網側目在道旁巍巍扃狴犴索索纏琅
當但慮無文翁何爲憂箭張

良弓不全終涼法始於漢辛勤蓬葆徒乃以人狗判當其設
喻初目早無絳灌奈何天下才沈吟苦不斷徊徨娥姁術悽
戾鍾室歎樂說何人斯封侯媼蕭鄧

古人重節槩要貴託死生不解游俠傳乃列樓君卿朝致呂
寬獄夕博輝光榮同時谷子雲阿鳳亦有聲何怪千秋下二
客俾齊名

建元敦經術通藝及郎吏兒寬對廷尉乃謂弗習事儒生不
署曹張湯失交臂逡巡上畜簿奏當見才地文字與法律一

理詎殊致擾擾乾沒徒田甲結私誼怒馬兼鮮車誰歟其圖治

士習患標榜清流雜污瀾東京俊厨號何必無賢奸國家嚴黨禁深意存衣冠不見李元禮聲名動朝端一夕詔獄成故吏皆糾彈總總數千人立名誰不刊龍門在園扉登者心爲寒惟聞景御史上表自辭官

西京羅甲第北里盛歌鐘金張侈服食趙李相過從荏苒丁叔末減俸賦不充建安卿相厄採和悲飢窮世運與物力夫豈長滋豐三復持盈理遐哉唐魏風

夏后惜分陰晉曠喻秉燭人生無賢愚年短苦景促士行起負薪激烈投博局功名始蟬冠風塵冀南服王室似滄海橫流爲一束丈夫重致身長恐日不足悠悠收豬奴安能識鴻

鵠

杜家著新書正元名始布
傀偉燕然銘倜儻鸚鵡賦
寸晷試衆長抱負豈非素學人
一表彰餘子安足數名實本相須
沿流謬依附小儒亦沾沾乍見恐疑怖
僕射有楊公毋爲致其怒

街玉玉不美噉名名乃虛
寧圖千秋業而爭一日譽
東莞劉彥和典禮窮居諸雕龍
四十九傳世諒有餘區區吳興郎
安足當吹歔才華卽求售何至候人車
流風日波靡行卷投趙起咄哉昌黎公
乃有光範書

樓煩雜詩十二首

萬古樓煩國平分十六州
蒼厓三伏雪白月四時秋
飢虎宵巡郭猜鷹午下韝
欲知河水濶北望是偏頭

埤埤緣巖粵我我百雉雄重關遮日逐飛閣瞰雲中植鍛星
施施鳴弦月羽弓防邊原重寄誰是筆頭公

往在成周會爰閭列貢圖地從開主父王遂換林胡探穀雄
威盡吹餒壯士孤拓疆天上夢乾笑史遷誣

爰運東西漢秋高轉戰場移民四郡實發卒萬人強節其憐
馮敬功難數郭涼至今沙塞月不獨弔韓王

魏神青龍歲鮮卑騁騎秋大人來保塞別將失并州獫狁今
何處蟲沙各自愁陁南與陁北不斷陣雲稠

六三齊帝識達速魏王川彌澤邊烽靖蘭陵主貌妍魚羊方
食肉殺斃又飛天一角祁連水波旬閱幾年

霸略神元首威名大業高撐廬阿廢帳芟草可汗刀瘦馬遺
龍骨殘山落雁毛汾宮無片瓦慵與撥蓬蒿

閑廐三邊使沙陀百戰功祿兒原盜賊亞子是英雄房舍寒
蕤草雕雲迴搏風無窮唐壘憶都在角聲中

黃草梁頭驛紅門口上營衛加千戶所官總二邊兵關路紛
圖說屯田議守征百年爭復套若箇請長纓

西去汾山近汾源衍派長一泓激匹練千里下平陽樹闕臺
駘廟秋先拓跋岡余未聞樂地天水兩蒼茫

叢祠拜都督奇節等常山劒氣虛帷冷刀光畫壁殷運難扶
末祚旣首失雄關不忍瞻遺像棱棱甲尚環

舊是防秋地今看上將臺幕烏衝雪起獵騎卷雲來令肅官
櫓靜天寒曉柝哀受降城咫尺珍重勒銘才

一夕

一夕旄頭萬馬奔臯蘭烽火達昆侖赤丸潛探元戎幕碧血

難招郡將魂，祇道纏頭能鬪穴。竟無精手與當門，狼弧引領飛龍騎，并掃連雲左輔屯。

兵車行

鵬窩梁頭吹角罷，夜半山城羽書下。朝來梟牙看點兵，束箭去作甘州行。刀槍十十復五五，謀克沈沈猛安武。火伴傳呼領具裝，家人哭悔編軍府。城門湏洞鳴篳出，犀兕甲裳耀丹漆。萬馬先懷噤血心，斗擲胭脂好毛質。紅顏白髮提壺漿，塵埃蓬勃雲蒼黃。傾城聯轡走相送，鼓聲隱隱催漁陽。丈夫自當爲國死，那得臨歧戀妻子。吸盡生離舉奠杯，畱將日後招魂矢。旗獵獵風淒淒，一語不聞聞四蹠。三邊健兒好身手，金印須當覓如斗。百隻肥牛待歸剖，僕射由來愛戴堅。水衡養士况年年，請收南浦傷心淚。笑飲西涼百眼泉。

鼓角四首

壬寅

鼓角下遙天，妖氛落斗躔。
殘兵熊耳積，吉語馬頭傳。
見軼眉何益，當輶臂孰憐。
還應玉關路，刻石倣燕然。
持重休兵策，長圍逐日增。
三旬堅壁守，半夜拔孤城。
懸地營燒最，上層摩雲餘。
故壘殺氣尙，憑陵內府來。
飛將雕弓霹靂誇，五威屯九虎。
一鶚走羣鴉，寺熄摩尼燄。
風清枹罕笳，靈夔櫺鼓曲。
傳唱徧瓜沙，俘馘迴雲騎。
飛書報露章，槍陳秦武衛。
碑勒段文昌，茶服花門拜。
春光鐵勒長，書生無汗馬。
鐃吹擬平涼。

昔聞

昔聞安定守，不問馬如羊。
詎謂輪邊粟，翻成盜太倉。
南衙案金布，東市集冠裳。
應悔涼州博，蒲萄一斛香。

城南杏花盛開沈確齋別駕

徵楷

招飲張氏園卽席

作癸卯

山原氣暖香風嫋流鶯間關報春曉玉鞭七寶颺晴絲馬踏
春蕪軟紅繞十里霞烘芳甸齊片旗青颺邨墟小畫樓昨夜
雨初乾凝脂半浸燠痕杳休文游興匹樊川韋曲穠花恣意
憐行廚盧氏長鬚健載酒羊車小史便修垣繚曲環花塢玳
瑁文梁燕新乳絕豔盈盈酥乍融香雲濛濛日亭午黃蜂粉
蝶鄰牆來銀鈎翠箔東風開紅紗中單玉膚逗一笑影落流
霞杯休言阨塞龍堆近苦恨涼颺撼朝槿如許朱顏儘客看
天涯何地無金粉玉醴傳觴醉不辭開紅還與譜新詞戰場
莫說蟲沙怨此是春農舉耒時

鞦韆行

非序

王仁裕開天遺事載鞦韆爲宮中戲江以南絕少今代朔尚沿此風每至春日比戶以酒盒相邀粉黛成羣畫牆朱戶間觸目皆是戲作鞦韆行紀之

東風掠面吹香塵燕子簾櫳紈扇人駘蕩冶情三月暮飄揚紅影十分春春人曲奏春光好蕙轉蘭薰暖浮草宅夾灰河水北亭檐低桒葉城南道白楊門對鬱金堂玉檻銅溝亞字牆喚取雪兒扶彩桁催教琴客啓倉琅千秋式倣開元製紅索垂垂竿細細代朔真宜貼地腰江南誰省仙人戲社公雨歇轉新晴翠袖嫵嫵挈隊迎金縷繡成誇樣窄越羅初試喜衫輕踏青鬬草都無緒悵望游絲榮落絮要賭驚鴻掌上身珊珊小試冷風御雲鬢掠削互兜鞬結帶盤巾女伴催驀地明霞彩楣落一聲瓊佩紫霄來迴翔纖趾鶯梭擲慢舞輕旋

論丈尺花底生防露半襟柳梢已被窺雙鳥
藤蕪徑畔畫樓邊叱撥年年記駐鞭百褶衣香霏院外九天珠玉落風前
翩翻傳遍唐宮技額黃微褪柔肌靡卻步蜂鬚蝶粉間回身綠映紅遮裏
綺陌看花夕照多三條五劇奈春何隔牆分付多情月良夜明明送影過

閑情四首

香種猗盧北仙根幹耨家姐應呼嫵嫵年略長茶茶韡韡穩鸞頭
鞦衣裁豹胛花薄寒宜酪飲暈臉上朝霞方麴蟬紗障揚鞭小市東
脂輕開兩靨漆重點雙瞳龍蓋橫簪影駝鬘寶轡風焉支山近在名字稱紅紅
翠幃斜捎柳金沙碎碾麤長檐獾婢壓短轂獠奴扶綺席猜虞
妊鴉鬢認固姑眼穿蕃馬隊許駕六萌無

羈幘藏嬌小葦庭占好春笑看釵反插夢憶體橫陳路半迷
熊室書空託鴈臣羨他研絲絹長繫領邊巾

雁門關四首

甲辰

直上三千尺崇岡石棧孤關形雄倒馬山勢接飛狐雪壓玉
腰品風寒金僕姑遙憐洞庭雁猶自解銜蘆

絕頂憑飛閣河東半壁天撥雲窺八部揮手指全燕暗壑燐
搖火餘冰澗咽泉英雄頗牧去陵谷亦淒然

斜陽下殘堞迴首一沾襟了角晚烽斷郅支秋意深谷呀羅
虎夙杉動啄烏黔老盡漁陽將蒼茫拊髀心

昭代懷柔遠無煩右顧勞羽書西輔靜管鑰北門高廣武亭
延月滹沱岸拍濤春花生土櫓匣冷赫連刀

石峰

石峰遺堡在拔柵憶哥舒聞道豺牙厲仍吹虺毒餘定西風
卷籜渭北羽馳書不是嫖姚將纔槍孰掃除

周忠武公墓紀異詩

并序

乙巳

乾隆五十年夏杪霍潦浹旬溪澗泛溢城南周忠武公墓在
半山爲灰河水所蝕土脈坼裂官議築隄護之而水猛工不
克興一夕雷電交作水所經處忽墳起一山長三十餘丈高
十餘丈蟠屈墓前如隄防然墓得無恙萬衆詫歎咸謂將軍
靈也作詩紀之凡三百八十字

大圜覆空殼谷神鼓其內畫山兩戒分奠嶽百靈配飛來理
則誣彈指說尤悖及乎弄神奇造化出狡獪精英激頑冥常
理安足槩今年暑新徂雷殷白日晦邇邇雲吐欲溱溱雨霏
霽匝旬倒琤詰旦坐黝昧中雷歎涸漩階祀濺璣珩重陰

鐙�難苦溼衣或焙崇岡屹城南崆峒壓崧岱下蘊忠臣骨
朽壤翳榛穢灰河遶奔瀧剝蝕露沙碓淋浪兼愁潦山脉忽
破碎茨防枉人功邪許艱築埭竹捷術已窮保障天其賴狂
飈陡憑怒中夜吼靈怪石命愚公移根用巨鼈戴平川一鼓
盪礮礮驚沸潰排空聳波心墳起出地肺拭目乍愕貽轉頭
見礮礮坂坻旋截業厓隙勢向背譬諸築壘垣殊不藉鉏耒
又如勾萌物怒發非灌溉起伏紛連蜷叢草互鈎帶洪濤束
坡陀峻湍潛避回奔走告長官詫嘆駭羣睽詎緣山中英弄
巧戲儕輩又豈坤輿靈鬱勃不可耐異事各聳競神意知有
在將軍殉沙場齒齒怒穿齟生無百夫贖死復一抔壞天公
善補過有力敢自愛風雲護殘骸幽明兩稱快華表高長撐
椒漿謹重酌圖經義未詳齊諧志當載小儒費搜討畫史煩

藻繪吟成雨不止俯仰發餘嘅忠武墓前出山一事傳之者
宰斯邑兆蓀親從往觀卽於是夕成此詩蓋非郢書燕說比
也嗣家君以此事上諸大府中丞農公立捐三千金重葺忠
武祠宇并勒碑紀其靈異此
詩中所未及詳者後識於此

笱

城頭月黑雁飛高城下都軍夜帶刀一種秋聲誰管領紇干
山北薛陽陶

染峪山龍泉寺

參天萬笏攢如屋前有飢蛟後元鹿懸厓滃雲雲滃木一徑
陰森走深谷黑風撼人馬尾縮叢條畫嘯山鬼哭花宮何年
絕頂築帝遣夸娥操舂搗吳剛斧快神臂速斫斷劒鋸成老
禿芙蓉一朵香雨沐紫府穹窿踞其腹番僧百年瞳子綠石
窟凝寒趺兩足佛幢垂垂鐙似粟古磬忽敲清漱玉怪禽銜

果供半菽猛虎蹲門作奴僕謂余少留噉魚粥礮雲遮頭催
轉轂山英四號不敢宿電擊霆砰走相逐冥冥大壑竊且曲
燐火導人如秉燭天都一去難再復涇翠侵衣散餘馥迴頭
欲問居可卜似訟郎君爾無福

鎮朔樓十二韻

并序

寧武緣山爲城北門其最高處上建樓曰鎮朔雄麗揭孽屹
峙萬山中爲一郡之望明季李自成攻城時所發鉛丸矢鏃
尙纍纍窗戶閒可捫而數也

傑構基扁護飛甍旭彩浮登高今勝地築堊古邊州盤漠鵬
時下摩空雁亦愁秦雲遙欲壓朔氣冷全收蛾賊連羣日狼
煙上將憂勢真同燕幕交幾失蛇矛颯沓星弧落礮礮奔石
投羆罷千歲劫猿鶴一軍休關路清烽燧郊竿褭旂旂黃雲

屯敗棟碧血鎖危樓目斷龍堆戍魂招鹿塞秋寒風悲壯士
終古自颼颼

陽方口

丙午

征車五月馬蹏催戍壘縱橫有劫灰扼堡地爭中路險排牆
軍可萬屯開遙林似薺當關數溪水無波抱石來怕說楊家
老防禦秋風吹淚橐蓮臺

馬邑道中三首

風卷驚沙一障開寰州西傍拂雲堆紅羊蟠嶺流沙去翠鵝
拖秋瀚海來壯士近多諳吏法書生誰敢議邊才金刀校尉
兒童記話入斜陽斷角哀

漢家天子邊防重虎落周遭樹戟幢太守威名推第一將軍
材氣本無雙甘泉烽熄孤塗走服匿廬空六角降千古封侯

遺地在桑乾東下水淙淙

時平鉤鈇化鉏犁起聽嚴城夜半雞馭吏不驚囊赤白倚廬
那用尉東西路通注水神駒健天入陰山斷雁低猶有呼鷹
問騎將北風吹滿錦障泥

懷仁

朝呼漚水渡夕倚雲州郭積陽無晶光盛夏亦蕭索居戶不
盈千土銍依葦箔豚闌地半弓馬矢牆一角懸鞍進藜糝解
渴思鹽酪漢家度遼將曩日困鈔掠頭曼跡久陳大峪險猶
昨琅鐸無喧聲琯弓有遺繳淒然望重關已下嚴城鑰

大同

平原屹萬雉絕漠迴衝颺北極地孤迴西陲氣聊蕭高牙此
開府部伍肅不囂斜日冷大旗鼓角聞遙遙紫宮旣蕪沒鹿

苑餘畊樵叛將骨應朽國殤魂孰招商民頗駢坐士女亦冶
姚感彼昌丰象想見烽燿銷嚙槽喧廢馬掠野騰雲鵬時平
念忠盡哀歌懷李超

聚樂堡

迴野喧騾綱晴曦裊鞭影數家並塞民百堵荒寒境聚猶列
屢市劣不成閭井茨廟昔建置耕屯備邊警地分都尉治士
列牙軍猛側想簫笳喧颯沓纓羽整宵烽百年無民氣四時
靜貰耐臨壚頭北風酸射餅

紇干山

蓐食徂邊庭侵星促長駕蕭蕭蘆管音寂寂雲中夜白馬寒
自嘶黃羊健誰射岩堯遠山影壓夢吁可怕元風西北來搖
月慘將下凍雀何不飛商聲足悲詫

桑乾

涓涓桑乾水源自洪濤山號曰小黃河汎濫燕冀間雖收灌
溉利亦勞隄障艱司州發端處細流殊潺湲往往陽焊歲徒
涉恣往還千里及畿輔乃有奔騰患燎原理則同濫觴勢誰
閑感慨潰防事迂衷自循環

白登

白登山下客星過戰跡平城付逝波憶自重圍天子出盡傳
奇計漢臣多沙隄萬足騰宛馬石窟雙峰湧桑駝今日一家
中外合春風不隔兔毛河

遼太后妝樓歌

奇首八部興潢河國權半屬改耨廢青牛嫗出可敦貴參贊
直匹鄴平聲侯何淳欽云亡撒葛弒重見聖母臨統和御容殿

頭決朝政玉盆灣口開行窩雲中故縣城半角妝樓基壓桑
乾波想當校獵屬暇豫鞞絡臂綰輕輿過同心帕裝媚絳味
雙結玉佩鏘烏鞞駝尾簇翠坐捺鉢軸簾閃影頒頭鸞流泉
一鏡晃白道照見皁髻秋花羅駟車逝後闌楯廢敢塗殿亦
蕤煙莎東樓西樓罷謁廟十帳九帳停吹螺鴛鴦瓦冷蕭字
沒香泥柱脚空摩挲迴憶從戎灰洞口戰跡遠到青泥塢桑
宮繭館太瑣屑往往馬上揮凋戈意中不復有任嬖區區馬
鄧安足多豈知雄略蓋一世再傳乃有菩薩哥齊天巧思構
奇變宣懿詞藻招誅訶多才瑟瑟枉詩諫天祚國步旋蹉跎
此樓興廢亦偶爾乙室家事煩悲歌脂奩粉盞葑苔巢荒臺
蔓草愁滂沱焚椒遺恨更填臆欲話往劫無青蛾茫茫蕃帳
斜陽裏獨詠香詞走紫駝

枳兒嶺

飛梁繞修蛇怪石劈鬼斧人聲出天脊馬足洞山腑直下皆
懸厓決決暗泉吐千年悶頑陰有眼孰敢俯路窮見斜徑峰
轉得小聚戶稀常斷炊煙淡不成縷荒祠兩三間白日慘牆
土敗佛無全身貌與樹爭古殘魂弔天驕畏路避渴虎淒唱
山雀吟前峰仍午午

八達嶺

兩巖夾層雲線路爭一指峰高不肯俯偃蹇瞰天咫我行登
頓疲計險忘計里呼風馬批耳嚙腳石排齒嵐靄北條來蜿
蜒撲眉紫奇哉老太行元氣果不死憶在明中葉三輔屯錯
峙建瓴俯神京居庸列其趾時清牌堠疎道古榛菅迤日昃
聊停驂秦城倚殘雉

鷄鳴驛

巉巉石筍如踞虎恒嶽流雲遠吞吐鷄鳴驛口上谷西一臂
全遼垂萬古我來瘦馬踏沙行不斷關山羌笛聲武帝樓臺
蒼蘚合蕭家池館暮霞橫甌盧小帳環寒郭宰堵孤撐語風
鐸八水鴛鴦合沓流三關鷹隼當空落征旗狎獵度洋河紅
草溝邊好駐珂白羽射鵬豪客去靚妝盤馬美人過生年未
識江南好便逐飛鳧向雲堡折戟魂銷托邏臺黃金日落燕
關道燕關窈窕足燕姬酒熟當筵舞柘枝且歌阿子歡聞曲
和我陰山斛律詩

宣府二首

龍堆夜氣接漁陽獨倚和門望大荒玉帳照斜三輔月金笳
吹老一城霜燕支山遠秋無色拔里臺傾土尙香愁絕孤亭

園萬柳絲絲風入鬢邊涼

宣仗離宮建羽旌當年巡幸肅弓刀卻來御苑憐黃土誰使
將軍號赭袍罽幕寒支離磧遠花臺秋颭隼旗高鷹坊虎圈
悲風起和入長松作怒濤

土木堡二首

夏口風霾夜鑾輿此駐營雲端墮天子兩帝失先生貂幸魂
誰惜龍潛卦早成裕陵園近在草接豆田平
不信全軍出真成孤注憂臣援瑕呂例君洗靖康羞元老扶
危策宵人倖賞秋南宮遺恨在唱盡白符鵠

居庸關值山水暴漲作歌紀事

昨宵雨過林含煙狼山野店寒無氈曉策青驄出茅屋千巖
峯嶽紛迴旋初疑絕壁屐齒折漸訝細路藤梢牽疎松位置

出無意十步五步相延緣馬頭忽上亂峰頂
誅蕩氣與青冥連嵌空下摘石竇乳舉袂欲
拍洪厓肩雄關突兀已在望蠶叢一徑遮全
燕鴻影不度雲漠漠磴痕皴裂苔芊芊危樓
俯窺上谷塞遠勢旁接盧龍巔是時匝月苦
霑潦衿袂百丈奔飛泉喧呶怒吼當道涌幽
壑斷崖成巨川如遊匡廬看瀑布匹練曳出
珍珠圓又如錢唐破陣樂撞鐘伐鼓龍宮前
槎枒削鐵已足駭况此攔路波潏潏公矇兩
目迷五色行旅攬轡愁連邇平生讀書誇九
險陞訓方信淮南篇壯懷豈以風浪阻凌兢
且策驂驪先霜蹠欲落不敢落一蹶已下清
泠淵騰騰四足蹴蛟窟面面疊浪漂銀韉巨
石中流大如甕盤渦兩搏爭喧闐的盧忽仆
箭脫筈游韁急勒弓引弦掀然躍起二三尺
直破蜃霧衝洄漩山英陽侯不我厄崎嶇歷
盡身安全

伸眉長笑在平地但見疊翠青連天返思曩險已幻跡入離
出坎無俄延隙光電火總快爾憂患何必多縈牽成詩章
誌感激有人北牖科頭眠

彈琴峽

疊翠拱天府列嶂等樹屏四圍關嶺合一綫秋旻青奴子緣
木杪飛步高竚竚我自循澗曲支筇走伶仃設險緬勝朝寇
至無重肩奸璫安足責憑弔勞心靈松風解怡顏雨過聞草
馨嗚咽巖下泉清音奏瓏玲奚須事操縵恍爾鏘仙鈴成連
已長往昭文坐忘形塵劫去浩浩幽懷愜泠泠夙明無弦旨
獨向空山聽

塵海

塵海渾如霧車聲殷若雷濫隨充賦隊誰抱練都才溫卷書

生賤梯柴廐舍開寥寥年少客斜日眺金臺

伏日尹楚珍閣學

壯圖

席上作

雷雨虛堂歇茶瓜令節新從容卸冠佩清切話絲綸粉筆頭
廳客黃裳末座人褒揚能稱未交愧紀羣親

陳玉臺給諫

昌圖

王秋樵吏部

瑣

毛宿亭舍人

周小泉治中

海

集飲寓齋

下直花驄散閒坊曲宴酣飛騰前輩在負荷後生慙分許忘
年義狂應倒佩簪金門容大隱街鼓任緜緜

玉河

雁齒分橋路鷗波傍苑牆觚棱樓影直沙觜柳風涼朝士朱
丹轂汀花黯淡香芙蓉好顏色疇解集衣裳

宮詞八首

并序

春闕含風銖衣易故秋深長信紈扇誰憐況復露井桃開璿
閨夜永歌來別院和蓮箭以穿花影抱疎櫳掩瑯匳而卻月
未免鮫裳帶緩蛤帳寒生銀鎖爲眉三秋不啓珍珠作淚一
斛平量南樓無買笑之金東閣有煮愁之賦於是腸迴痛定
思抽筆先詞帶露以成嘯句經秋而益脆弦么柱促彈成寡
鵲之歌葉悴風酸譜入哀蟬之奏嗟乎江上芙蓉後東風而
亦采華年錦瑟怨滄海以奚堪聊代虔詞藉申結轡造懷指
事世勿泥焉
姪娥生小厭鉛華一入椒風是內家不分花冠呼彩伴十三
樓盡鬪盤鴉
六更西弄緒風清新字宜春貼鏡楹紫袖昭容隨例慣蛾班
且自看那行

采殿清防雉尾臨黃麾仗下戟衣深歸來未忍拋鍼線猶是他年補衮心

驚鴻不學趙家兒那怕披香博士知自有蔣侯神位在雲芳空寫斷腸詞

義髻黃裙拜建章舞涓誰早侍明光綠窗深掩流蘇合手把金猊炷夜香

脉脉溶溶月上時芙蓉別殿夜歸遲任他銀鑰收還啟肯爲羊車插竹枝

梨花風動玉闌寒十二樓頭宴半殘排罷太平排萬歲似聞新樣要多般

玉階閒竚已黃昏明月梅花總是恩一日未央春帳暖須知不假賦長門

爲靜樂李洪九孝廉

錫書悼亡

河東門第魏城君，玉局淒涼望斷雲。
壓鬢西風禁幾度，低眉明月正三分。
苦將盡篋局魚鱗，愁對庭蕪話蝶魂。
憔悴來年京洛客，錦機誰與寄迴文。

冬日偶然作五首

道武誕雲澤昭昭，紅日光舉之參合。
一夢先兆祥卻收，慕容衆乘山觀晉陽繼運有明元。
屢戰平鴟狼，北陲苦寒地善守成。
金湯急募棄咸秦，得無嗤宋王。

秋至始折膠弓勁，敵易遲宋室。
多用兵庸臣，悞邊境。長城失天險，
乃劃分水嶺樓櫓亦奚爲。鐵騎任馳騁，
殘山浩長喟。野鳥弄寒影，砦堡無狼煙。
吾生抑何幸。

窮邊西北隅，有山曰蘆芽。上隱劉曜子，
服食雲與霞。層梯倚

絕壁細路橫枯槎四海亂戎馬一山香草花意欲訪星冠重
重巖壑遮銀槍弄鸞篋兀坐聽哀笳安得韓終輩爲我駕飛
車

北風號日夕雪窖無冬春長恐歲寒冽悲哉鳩鵲民千山露
枯瘦萬戶皆荆榛裋褐且不完安望燒烏銀更有驅車者跣
跋走黃塵堅冰上鬚結皸手成鱗皴官舍豪華子淺酌酒百
巡庸知道路難彼此皆勞薪

地僻山勢促焚輪鼓萬竅時聞空谷中萬木作龍嘯北方尙
剛武並塞氣逾剽戕冠羽林兒長劒三河少代馬秋更肥高
岡恣登眺豺狼正縱橫狐兔亦喧踰曷不彎強弓兼邀縱原
燎奇材卽小用且博如臯笑

新正三日裘可亭太守

行簡席上作 丁未

忝列通家子弟行太守尊人文達公許陪參佐醉蘭堂蛾眉
玉塞初三月虎節榮公第六郎太守行六數斗醇醪忘病鶴百番
行卷唱黃麕新晴好策頌春馬雁戶冰天望正長

李洪九公車北上便道過予酒閒賦贈二首

花幕論交半榻於酒場茶陣幾軒渠從無才語窮橫塵大有
元文錄小胥吟社散愁聽落葉故人來似獲奇書臨歧尙要
遲行色墨露還畱一斛儲

星迴月轉歲初終一笑屠蘇盞盡空小海唱邀沙塞月大蘆
笳咽夜簾風才名河朔空凡馬春色關山有斷鴻珍重薦雄
文似者長楊賦手向來工

洪九將行復贈二首

一自文鴛別畫堂幾將遺挂認餘香淒其紈扇三秋月辛苦

征衫五夜霜揮淚秦嘉仍上計奏書臣朔本東方樽前獨抱
春風感已踏槐花兩度黃

青衫蓬鬢影鬢鬢明發脂車促兩驂燕市故應收郭隗渭城
容易感何戡詩緣惜別忘重複話屬傾心要再三他日延登
應憶遠梅花笛裏望江南

塞上春詞六首

黃雲遮不斷春紅青帝飛車到紫濛羨煞大牙旗一面最先
消受好東風

綠徧林胡萬里沙玉關草色關邊花怪他盤馬彎弓地也學
裙腰一道斜

小桃花放戰場頭萬馬營邊雨乍收恰似虞姬在垓下英雄
兒女一齊愁

七香車逐玉絲鞭隊隊三河俠少年誰信鳴弦好身手解扶
殘醉拾花鈿

壯士全家戍紫臺美人都在拂雲堆此間便是遼西地一任
黃鶯喚夢來

阿誰千乘載花遊上將行邊卷碧油前擁貔貅後鶯燕男兒
那不覓封侯

曉雨三首

一枕梨雲戶不開冶遊閒卻好樓臺綠窗何處春人笑剛拆
鞦韆雨便來

花朝上巳劇怱怱一雨涼生楝子風見說斷蕪調馬好錦韉
催試鳳頭驄

檢點新涼強自支放晴休早待敲詩年年酒渴鐙昏夜更愛

疎桐葉戰時

暮春城南作

馬上吟情塞上身東風吹側蹋鴟巾楊花節裏渾無夢杏蕊
梢頭略見春山石碎疏泉溜急沙田荒入燒痕新憑誰爲說
江南好三月香溪打漿人

署齋卽事六首

園林何謝總難方官閣山腰傍射堂烏几梳風爽甫塵青帷
邀月子雲牀花畦晨縛雙童帚茶竈宵開半段槍試讀秦川
公子賦可能信美卽吾鄉

綳帙瑤籤次第開摩挲故紙曲窗隈冊繙貝葉參花首硃點
丹經辨聖胎宿雨氣含琴牕潤新松陰遲鶴翎來忘情已慣
成南郭甘讓梁園作賦才

高城隱隱起笳笳子夜巡檐感物華風色峭沈三摻鼓月痕
黃帶九邊沙無愁苦憶江東尉易落生憐塞北花差喜粥魚
遙寺聽定中禪味在蜂衙

司空城旦劇蒼黃不到花間曲尺牀問絹客休誇令子折腰
吾莫慰高堂窮邊老屋三升酒故里溪田一稜薑聞說欲歸
歸便得好風憑仗送滕王

兔園冊敢薄羣儒要向書林乞慧珠偶爾好奇人道博浩然
懷古我非迂六更勝快撐魚目百軸油拳禿鼠鬚尙擬琅嬛
求福地西陽有路莫踟躕

熟食清明過等閒陰晴天氣暖寒間城頭野色還畱雪郭外
人家半在山坐閱跳丸驚石火起聽吹角憶刀環江鄉儘有
煙波夢白板雙扉緣一灣

南山

高齋面南山隱几山在側雲去山蒼翠雲來山
翳塞終年常相對窈窕不我卽翻身掩重簾隔斷
青山色

試話

試話三關好春蕪接雉媒野香麴麥雨炕暖豆稽灰羊毳寒
衣便駝羹小宴開祗餘猿鶴怨鴉噪夕陽哀

中元日擬遊城南未果口占示出遊諸友

踏青何必定春三。鈿盒東郊舊俗諳。新婦朱輪交揭幔。侍兒紅屐走傳柑。衣香隔浦誰畱佩。鞭影搖花幾駐驂。忽憶汀洲有蘅杜。又牽心事到江潭。

莜麥飯 并序

并序

莠麥形似小麥而弱播之寒土則易熟莠讀如油寧武人和

作餌以爲常饘考油麥不見諸書故乃田器郡志卽以此字當之未詳所據作詩以補廣志要術諸農書之缺持梁齧肥者未足與知此味也

樂天賜防風香味勝珠攬平津餐脫粟故人心不感食色固天性不飽愁願頷樓煩僻邊陲苦霧晝多晦礲礪地脈枯蓬勃天影慘盤無蟹將糖水乏魚投慘阱祿稿未詳齊民術誰覽常羞屏不赦嘉種出埃窻名殊禹餘糧珍類楚文歛療饑邁蕪菁分植依沙菱刈盼實纍纍華先狀蒼蒼方苞垂淺房甲坼萌小菌萬畝恣采掇千倉聚阿坎廚爨磨作糜竈妾羅輕攬搏丸水宜調掐餌指數臧蒸謝翠釜燁火用竈煤黠盛甌粉養香爭食非兒喊菜甲羅青莖芋魁間白糝羣居靜不吳據案饒有飡三飡腸詎鳴五饋味誠醺邊氓素淳懿飲食

耐恬澹奈何豪奢流千金恣一啖下箸尙朶頤見此恐落膽
徒爲欲逐逐枉費視耽耽平生讀奇書食譜究鉛槧五侯鯖
無需扁米法多聞得茲腹亦果取視首先領世無朝飢人膏
梁吾亦敢

雨望

堠烽寒不傳溼雲澹遙漬院花歛深萼牆燕塌雙翅清風宛
故人挾雨千里至野意生鉤簾幽懷落郊次環山解修容一
沐浮衆媚蒼潤兼喬林橫天闕空翠掩冉起客情淵漫渺遐
思闔關煮茶鐺散帙開經笥卻憶江南人輕帆挂淮泗

晚眺

蒼蒼夕樓迴數盡背城鴉隻堠呼韓戍閒坊捉將家邊陰寒
馬色旗角閃霜花獵罷者誰子北風吹帽斜

雨夜有懷

雲氣暮城合秋陰忽浹旬江湖生遠夢風雨釀蕭晨世眼名山賤交情失路真問奇空載酒盼斷草元人

愁

缺月偏隨客疎鐙自照人問年過射策搔首悔遊秦世路風波地高堂老病親空眠不成寐何以慰羈身

東劉參戎

黃

彭排清肅羽書稀落日蕭蕭照大旂壁壘兕犀團列校風雲虵鳥護戎機行邊飲馬長城窟說劒垂纓短後衣好趁秋晴呼獵士蒼鷹一點草頭飛

當白馬篇贈某左司

六郡良家子結客少年場身爭怒隼疾氣共飢鷹翔朝日耀

組練長風飄，補襠腰間烏號弓。馬上綠沈槍，十蕩更十決。霍
霍生迴光，兜牟肖山製。穹廬倣天張，男兒作健身。關敵不鬪，
庭黃河流汨。勃黑塞鬱青蒼，一戰陷堅陣。再戰摧排牆，碧血
裹夫襁。模餉獸具裝，功成不戀賞。持此登明堂。

夜起二首

手招籌邊樓，四隅黃花嶺。接小單于蒼煙不動，亂山睡看仄。
一丸秦月孤，羌笛慣飛邊。柳葉霜笳能說落星心，四更虎氣出城角。
風色怒來聲滿林。

萬佛洞

邊風堀堞路，屈盤檐牙矗。矗浮晴巒入門下，馬萬籟寂蒼髯。
獨吼擎孤竿，法幢高拂老蚪影。古苔繡蝕連錢乾，爰循石壁

拜龍象滿堂纓珞紛團欒雁排櫛比難屈指四大六根同一
觀我聞五蘊本幻設世眼何處窺倪端化身舊傳種種法畱
此色相塵中看摠衣卻步入精舍中有老僧如嬾殘竹爐煨
芋鼠雀靜斐几閱經蘿薜寒澹然跌坐呼不應垂頭自玩閭
浮檀少思繕性借禪悅華嚴法界虛研鑽結廬初地果何日
修門覺路迷泥洹無縫石塢不容世折足鼎鑪多野干靈運
饒他早成佛坐閱大漠生狂瀾粥魚茶板孰棲託尻輪神馬
愁闌單迴瞻三十二身相曠劫未悉空嗟歎流連啜茗擬論
列起聽座客談除官

書宋胡忠簡公玉音問答卷後

鳳箋繕就和戎草玉管分書醮龍腦湛露親承金鴨杯七十
孤臣澹庵老憑誰著眼覷征驂黎母題詩憶廣南已拌瑤闕

章難上獨愛銀山酒足酣詔書忽沛陽春澤朱厓絕域歸羈
客七字方吟蹈海詩千金早募匡君策建炎恩遇讓隆興五
月宮中卻暑蒸纖手蘭香捧荷瑣錦紋御席坐花藤先朝耆
舊誰能識南渡中原竟無色除奸未稱藁街心一宵漫紀東
華直細讀綸音涕欲流小朝廷尙誌宸遊空勞妃子歌金縷
記否瓊廬賦打球

土簪歌

伊昔漢時丞相治宮室飛梁石磴陵紅泉又聞君雲擅農稼
重檐複閣陂渠聯河陽金谷渺榛莽何況區區第宅禁千年
天堂高莫攀員莊制何取商量垂久遠永永避風雨一宅無
勞十萬錢五行只用中央土螭螭絕塞鄰烏桓白沙漠漠霜
風寒巖居愁傾穴居穩鑿坏以處誰曰藏身難犀銚利鉏斫

山骨連房洞闔封泥丸黏窗不用蜀宮錦塗壁頗取椒與蘭
朝朝大壑流雲護屋頂蒼厓掩深樹細觀一事更奇絕下自
高眠上行路吁嗟杜陵老叟詩中豪破屋卷去三重茅卻思
廣廈庇寒士江郊倚杖頭空搔我儕藏書況苦溼往往蠹漶
愁波漂高鳳持竿世所笑虞祿覆被無乃勞何如買山此地
居其卜秋風無驚書可讀同人莫題陋室銘君不見直父當
年尙陶復

寧武琰

大琰小琰出寧武工勝莎羅色交午長官取攜作地產縣吏
持銀索編戶大琰教舞稱耀瑜小琰深溫坐席鋪紅香翠暖
畫堂邃織人輟手寒無襦

讀史雜詠八首

客有以歷史中婦人與戎事入詩者所舉未備爲補作之

十三嬌女侍親闈一騎重關取救歸卻笑當時傳道蘊青絲
荀羅

霹靂弓開窄袖輕一雙飛鳥落沙平蠕蠕公主盤鵬地小隊

紅妝恰並行

朱氏

牽裙飛控簇金鞍射貫雙鵬左右看見說雍容驚小字何如

隴上有陳安

李波妹

伉儷將軍壓武都從戎談笑擅雕弧陣雲深擁蓮花幕絕勝
楊潘氏

平陽公主無

五季紛紛山雀歌一朝天命在沙陀楊劉夾寨英雄死爭似

夫人扈養多

劉氏

裹氍爲甲帛爲旗仗劒牙門自督師快馬健兒三日卻不煩

老嫗夜吹簾

沙里質

汴蔡重聞嬖子軍情因夫壻義因君若爲乞得綸巾隊共看
蠻華織五文

完顏仲德妻

湫城迢遞西河隔十載腰金佩虎符誰識健鷹飛不到居然
巾幗解馳驅

姚里氏

代州教坊曲

美人舊宅秦淮曲金粉飄零賸寒綠都將六代後庭花種作
三邊紫煙玉三邊地迴陵汾潞水繞滹沱波淙淙耶馬千金
白鼻騮兒家一帶青楊巷巷中綿亘起朱樓屈戌銅環鎖兩
頭夜閣狸奴偎枕角曉風燕子撲簾鉤鴉黃粉白樓前見官
柳爲腰杏爲面倭墮鬢敲七寶釵紅酥肌褪雙金釧兒嬖阿
母佛奴鄰教就翩翩掌上身乍喚調笙櫻口澀時緣記曲翠
眉顰逢人解說勝常慣習習薰衣香幾辨分曹射覆薛瓊瓊

促座傳觴于盼盼不隔南阡與北阡趙家姊妹總羣仙會聯
盒子邀寒食酒按花名啓玳筵珊瑚鞭燦誰年少結騎長秋
走相召束帛憑酬捉搦歌裂繒要博傾城笑傾城巧笑太憨
生那管闌干斗柄橫蓋底靈犀通叩叩帳中人月見明明吹
來蚪箭蓮花漏倦入眉山隱深秀寶釵旋鬆玉一窩文窗低
護春如繡善和坊外屋灣環別有梨園供奉班妙舞字傳車
子薛清謳調譜漢卿關薦蘿親戚周遭地聚族家家鬪新伎
雜沓琵琶瑟羅槽喧闐曼衍魚龍戲就中最有飄蓬客旦旦
羅襦戀薌澤問訊纏綿託萋萋函餘芳珍重藏遺舄纏頭金富
酒囊寬屈指歡場正未闌故鄉不道吳門遠修竹天寒翠袖
單

樓煩風土詞六首

綵幟青幡簇簇排春書纔進綴春釵長官略副祈年請發牒

先勾中瓦街

迎春之禮燈棚清靜存乎長官好尚而土俗相沿皆云此禮盛則年穀順成往往試之而驗

翦紈劈紙做嬋娟略比奴星送路邊富媳娶歸窮媳去大家

如願過新年

正月五日翦紙為婦人棄路謂曰送窮婦去娶富媳婦歸

耿耿鐙然不托香大填倉接小填倉不須掘窖盤游底平厝

烏銀當麥場

正月廿日名小填倉廿五日名大填倉煮餅然鐙於倉廩用炭屑布地作圓名掘窖

破費香泉幾斛傾龍擡頭日卯兒迎社公百五仍飛雪引得

癡龍作麼生

二月二日為龍擡頭日自外汲水由大門引灑謂之引龍

弓弓點屐陌頭聽六月香風駐畫舫怪底佳人遲拾翠天涯

芳草此纔青

六月六日男婦羣往遊白龍洞名曰踏青

花光釧影出闔都慶月尋春興不孤一道香隄萬裙幄馬頭

忙煞玉腰奴

中元節婦女傾城出遊席地飲宴竟日始散

老營堡

何年八面障先零，斗大孤城絕漠懸。
冷日野盤鵬翮燥，怪風沙旋馬蹏圓。
牙門白鹿爭行炙，小隊紅旗罷控弦。
閒煞太平蕃漢手，細吹羌管唱秋煙。

紅門口

明互市處

長城鎖鑰一關開，千騎曾聞互市來。
和息有名誇納款，遮關無術仗通財。
局更衰季邊愁掃，地總神州戍戶裁。
便欲丸泥復何事，諫臣庸帥兩堪哀。

大水口

康熙中西征準夷於此設站

瘦日忽匿雲驚沙，聚吾面蒼山如禿鷲。
有草不成禱，此路通瓜沙。當年置郵傳盤盤，怒石堆一騎。
走雷電，今來臥桴鼓。閒遊逐星弁，書生果下馬。
壯士紅陽燕笑遡陰山，風同迎雪花。

片頗聞期門言平世毋忘戰伏林有於菟摩挲大黃箭

黃花嶺望積雪

夙聞天山地五月冰雪壯茲登達速嶺積素浩難量千年無
炎夏一白迷背向渾來羣玉峰面面琉璃障或疑爛銀堆不
見桃花浪窮邊月黑時毛髮逼淒愴只有防秋兵甲光不相
讓荒荒呼韓庭兀兀都護帳會酌金留犁龍城約飛將

軍門公讌

大牙雙卷戍旗高拓戟狂歌許我曹角吹鬧攬營妓笛雪花
寒壓從官刀令嚴樽俎排千榼口熟孤虛話六韜此後燕然
儻銘績不才飛檄有枚臬

月夜作

我思仙人名浮邱乘雲御氣鞭六蚪又思漢使鑿空去直貫

人言角仙言集卷一
星槎博望侯青天碧海斷消息坐見東南生玉鈎玉鈎纖纖
畫簾晚銀漢瀾漫雁初返一聲野柝四山靜絡緯隔花嘯近
遠大漠窮秋夜有光登樓羈客欲還鄉誰家搔鬢驚羌笛何
處當窗彈履霜山河大地同清影世事沈浮兩萍梗心逐南
鴻一夜飛情如元鶴中宵警沙草茫茫思萬端人間那有路
途寬飛車莫訪赤松子只請排空上廣寒

鴉

魚鱗霞尾送哀音接翅荒城和斷碁輪與江南鶯燕侶夕陽
邊有萬愁心

小謨觴館詩集卷一

小謨觴館詩集卷第二

鎮洋 彭兆蓀 湘涵

南鴻集丁未迄庚戌

乾隆丁未季秋之月家君以病解職侍籃輿南下入雁門循太原而東越兗徐之郊至公路浦汎淮涉江以抵吳會馬背船脣不無所觸凡得詩若干首嗣里居孤寂所作綦渺不復別編都爲一卷夫鴻以北爲家及秋南征爲賓予少長塞垣其視歸也轉若賓焉題曰南鴻取喻且志候也乾隆庚戌元月中澣甘亭居士書於新溪小築

出東城丁未

身侍籃輿去心隨馬首東儘拚將傲骨從此犯秋風塢壁旗

翻路鵬梁脊倚空毋多勞祖帳鴉背夕陽紅

簪笏

簪笏非親意操刀試一官政寬宜地瘠心古耐山寒去矣成
初服歸歟愜考槃何人傳五柳吾願作雍端

陽方口

三號雞肋旦落月下長城畫角重關戍清霜萬竈營星懸沙
磧大泉瀉石槽清此後西風裏誰來弔北平

途次呈家大人二首

臥擁黃紬被十年阜隄風裏著歸鞭永辭牘尾棲鴉判去覓
吳頭放鴨船吏事任人談甲令邊才會笑案丁零只愁尙有
臨歧淚一路山民拜馬前

半馱書卷半裝衣無限山光落畫旗白草曉隨馴野雉黃河

宵逐聽冰狸久看漠北安屯牧不用淮西狀事宜
閣道鞅韉真失策苦緣刺促悞歸期

廣武

漢械繫裴敬處非河南之廣武山也

磴道層層轉風煙漠漠愁厓傾寒日隱山豁斷雲流齊虜名
何羨韓王骨孰收悲懷同阮藉揮淚過邊州

崞縣酒間作

投紱悲生事持廉感病親車看壓裝薄僮諒在官貧有阮琴
畱橐無糧鶴畀人崞山殘雪路捫酒莫辭頻

入雁門關二首

陟嶺山形變軒然起大波谷深容雪厚峰斷得天多馬怯鷹
窠峻人衝虎穴過上關重頰首落日下滹沱

寥落赫連營蒼茫李牧城風雲三晉氣車馬半天聲延鷺看

詩餘集卷二
新堠椎牛問老兵萬山愁立馬吾愧棄繻生

李晉王墓下作

三峰飄泊悲殘唐齊雲樓上歌淒涼誰援十八葉天子朱邪
系出金娑陽赤馬將軍賜屬籍黑鴉突騎威戎羌渭橋轉戰
果頭滅論功第一加平章霸才往往遭忌嫉礪山賊子東平
王表誅山南稱亂首無乃有意相參商東遷奇變起椒殿三
百世禩歸大梁雄心莫遂渡河志坐使木子成天亡我來下
馬拜殘冢豐碑剝蝕龜趺僵義兒子將盡安在楸梧松檟森
成行當年破賊過上黨還軍置酒三垂岡綠衣奏曲感衰老
樽前涕泗流沲滂一笑風雲爲變色奇兒帳下排銀槍獬豸
磨牙競竊國赤心家世真堂堂英雄獨推獨眼獨豈得例彼
邠岐梁柏林寺旁亂沙草射鳬川口霏煙霜西風蓬蓬墓門

轉雁山日瘦天蒼黃靈光浩魄自來去長與兵氣同飛揚

代州

斥堠笄山路鞭絲鉾陞秋寒泉嘗豹突神水問羊頭塞迴榆

陰直霜嚴馬色愁憑誰話鈞黨一訪吉祥樓

明熹宗時趙南星謫戍代州所

居小樓顏曰吉祥

漢雁門太守鄧都基歌

蓬顆鼎鼎蔽抔土酷吏雄威昔如虎僞宗三百不敢肆十郡
畏之如大府持節防邊雁門守六角十箭聞風走偶人不中
中漢法終使蒼鷹遙授首嗚呼民樸畏罪班史書獨先嚴酷
胡爲歟遺墟過者尙側目轉想網漏吞舟魚救火揚沸理不
常豈但坐殺臨江王不聞同時桐鄉葬朱邑至今遺民猶雨
泣

元遺山墓

野史亭荒宿草橫芳華載酒想平生燕南趙北關河淚大定
明昌廟社情壯闊滄桑悲杜宇老傳詞賦況蘭成青山一片
吟魂逝愁說烽煙上蔡城

續有作

三唐以後論詩法滄海橫流派別分秋兔有豪誰盡力長鯨
能掣定推君銅槃鉛水愁中雨璧月瓊枝夢裏雲畱得蘇孃
錦機在百番低首讀同文

道上見驅驢者被以錦韉寶轡感賦二首

關山雨雪晝淒淒方麴何人走大隄轉眼風前有衰盛翻教
肥馬不成嘶

一搯金珂耀絡繆弄風得意自長鳴誇他令僕人才好忌卻

麒麟地上行

寄題故明孫白谷尚書郊園

尚書邸第近城闔老屋當年綽楔新龍漢已更浮世劫鶯花
猶爲故侯春蒼黃殘卒哀庚癸惻愴斜陽話甲申卻指秦雲
通雁塞函關西望一傷神

忻口晚行

脂車陟元冬慘瘳日在尾隄危路爭猱嶺陡馬緣螳獐颺卷
孤茅勢若走虵虺老楓作人形返照發光煒漢賊談王黃孺
子笑陳希區區一代相弄兵犯不韙誰家孤冢破髑髏出榛
莽行人撻蓬指得無兵死鬼往劫何陳因阨塞天靉靄夕烽
舉邊樓浩歌爲歔歔

野店

野店日初昃，
捫羊亦可斟。
沙團羣幕小，
山壓一村陰。
戍戶稀，
黔首殘槍委綠沈。
怪來東去馬猶有北風心。

落月

落月射車背，
四更寒氣微。
斜光冰著手，
一白雪侵衣。
羽騎行多噤，
林鴉凍不飛。
濁醪能暖客，
曙火趁巖扉。

太原

展軫抵狼孟，
舊地扼河汾。
碧瀉唐祠水，
黃飛漢塞雲。
儉風存古帝，
比屋半牙軍。
不見安于老，
關門又夕曛。

止太原旅中盛觀察

禱

出朱提以佐家君，
辦裝感賦。

行色蕭疎滯晉城，
西風吹袂峭寒生。
大錢何補空囊澀，
繡斧能憐薄宦清。
萬里河山開笑口，
一家風雪穩鄉程。
懸知種橘千頭者，
未必關心到上卿。

晉陽懷古四首

嘉禾唐叔分藩地草付兒孫割據州百戰終輸姚弋仲一心
難得呂婆樓風煙暮逼三城戍山色淒連五將秋太息鳶泉
談報復有誰雄略繼堅頭

河魁帳卷朔風涼賀六渾開霸府强青雀天教化鸚鵡蒼鷹
家早奉魚羊邊頭夾隊花千乘陌上迴軍酒萬觴欲向韓陵
求片石崛岉山畔路茫茫

萬吉丹書授籙新區區宮監解亡秦募兵先借雲中寇仗鉞
終歸日角人百道虹光占紫塞一房弧矢走黃巾曾緝創業
溫家注愛說乾門王氣真

金刀餘孽勢飄零四塞空勞占地形不待真人生怕赤早看
天子有雕青嚴城百匝驚蹲甲丹仗三衣笑講經休問飛鸞

層閣址草痕猶帶戰場腥

晉祠米

一水泠泠流碧玉種出嘉禾異常粟滑欲翻匙飽猶嫌白若
截肪看不足土人貧薄那易嘗畱與長吏充餽糧安得此水
徧西北便使鳩鵲皆膏粱北風砭肌天似墨道旁流庸餓無
色對食茫茫不能進粗糲吾儕已逾分

榆次

清跨橋頭水汾流一道深叢山渾睡態獨樹抱冬心縣古傳
聞誤田荒野燒侵殘墟畱武觀酌酒弔盧諶

壽陽驛感韓文公事作

幽州兵向深州舉尙書不與健兒語么麼種出阿布思血衣
那記先太師侍郎宣慰辭京闕獨以一人探虎穴園花巷柳

總關心淒絕團團馬頭月嗚呼縣官安復危韓愈可惜知者
誰朝廷祇救牛元翼獨不見希烈懷光殺齊勅

井陘關

羊腸犖确徑屈斜冠山迴首紛煙霞石梁險澀跬步怯陵兢
馬足煩鞭撻流膏石髓迸崖骨齧雲危棧森齧牙峭壁截路
路復出仙掌何事多要遮曉風過耳聞畫角雄關入眼生槎
枒地當燕趙此阨塞金刀鐵馬肅不譁悠悠旌旆颯秋爽淅
淅斷磧披霜花山川滿目色不改廢壘卻憶成安家由來窮
交固難恃刎頸那保無乖差鉅鹿脫印禍已伏草山赤幟紛
髮髭凶終隙末有如是人世敢以金蘭誇淮陰廣武皆蟲沙
滎陽成臬空攫拏時平惡聞形勝說填胸腐史胡爲耶孤村
坐據天下脊落日獨數投林鴉噫嘻金城鐵牡勿復論頗憶

江鄉青竹一道圍籬笆

平定州山行二首

平川起陂陀如頃忽生瘳征車轢沙礫有若骨在哽疲馬力
無多兩驂一轅并初登視後鞭再陟繼前猛石坂橫層霄輪
蹶亂人影怒雷碾雲中餘響落諸嶺地是燕南陲東扼常山
境干戈老羣雄煙火俯萬井豨膏與棘軸艱飢終朝騁世路
多缺缺攬轡還自省

盤盤入叢巒老樹紛蚪蟻崦前有來騎仄徑出馬頭崖深野
穉據泉落蟄蜃愁怪禽唬暗谷腳底聲啾啾忽上羣峰巔日
色慘以幽九天飄欬唾一掌收并州人傳媧皇廟遠在西山
陬配以太昊祠神座肅冕旒寒煙井陘重殺氣金方適手攜
太行雲高吟陵九秋

山店醉題時夜三鼓

顛厓架广夕風寒劍擦尖山面面攢疑在將軍氈帳底橫磨
十萬月中看

又絕句

繩牀鋪草戶纏藤身宿危巒最上層尙有新詩題壞壁寄聲
山鬼莫吹鐙

真定

孃子關前數塞鴻黃鬚馬客走蓬蓬地爭秦趙殘棋劫人有
幽燕老將風漳浦清流霜坂白西屏高掩夕陽紅曾聞買醉
堪千日要訪村墟潦倒翁

腰站贈人二首

茸帽初彈九陌塵當筵紅袖昵生春傷心莫譜關山月半是

龍堆塞上人

朱脣低沁玉梅香
掠月分犀映額黃
同是盈盈畫堂女
阿誰容易嫁王昌

東阿懷古十六韻

舊國追河沛遺墟接魯滕
君侯湯沐在祠祭祝官承鄴下名
藩建黃初夙德升恩情憐白馬
身世痛蒼蠅詞賦家庭擅猜嫌
骨肉仍臨觴心獨拊賚枕事何
曾志切三光照才寧八斗矜然
其煎太急縫布患應懲祇有名
山業能教異代稱定文推主簿
采實念家丞典午風誰繼遮須
誕莫憑雅歌開七子高殿廢三
層華屋生多感丹情願不勝魚
山今寂寞嚮藻昔騫騰跡杳芝
田駕靈依紺宇鐙惟應聽仙梵
流韻繞觚棱

魚山神女祠十韻

翠幃藏煙地輜輶入洛人仙家畱眷屬天上締絲繡匹擬文
簫亞緣方匏爵親旄旗蹤隱約霞靄望鱗皴夢雨瑤宮夜苔
花玉座春辛楣冷香火甲帳闕音塵調不聞湘瑟芳誰薦渚
蘋蕙蘭前浦遠松檜四山鄰風馬雲車路明璫翠羽身長歌
流水曲惆悵當迎神

在平馬周故里

一斗八升酒懷壯二十餘事封章當奇姿不愜鄉里兒知已
乃有中郎將賤作新豐旅中客貴賜翠華宮畔宅男兒生爲
忠孝人亦仗區區薦揚力火色鳶肩土一邱平林落日生羈
愁才如終賈世不乏吁嗟常何何處求

嶧山

榛煙起林垆風色來徐泗孱顏望單椒嚴冬闕寥窳始皇昔

登封頌德諸儒議傳資樂石堅體析窺巡字秦法愚蒼黔劫
灰掃圖志如何思不朽終藉文章事野火燔琳琅晴雲蕩郊
隧羊車渺遺蹤鳬嶺接遙翠聊當撫孤桐一貰魯酒醉

匡衡墓戲占

說詩千古重騷壇妙義曾經付學官聞道解人頤便好可知
莊語世間難

蕭望之故里

貝錦憂讒甚申椒寄怨深并將臣子恨同感客遊心古碣草
交偃陰風樹一吟千年恭顯輩曾否有知音

邳州

孔望山連鐵佛峰夕陽蕭寺不聞鐘幾尖檣影邳城屋萬粒
煙痕下相松終古風霜憐朔雁及今人物孰元龍殘黎乍墊

黃流殺珍重連牆聽夕春

夜行下邳驛道中

替戾車鈴弄晚晴朔風吹炬滅還明銷魂馬首初三月放眼
江南第一程帽壓霜華寒有氣天迴珠斗浩無聲長年星飯
宵征慣鐙火煩他候館迎

項王墓歌

英雄失意庸奴笑書生慣哭憤王廟茫茫白眼三千年到此
纔堪一憑弔生王之頭直千金死王之壠無十尊行營高敞
亦何事同盡笑爾韓淮陰不見秦家金銀錮三泉玉魚金碗
來人間又不見漢家復土稱將軍長陵殯殘對斜曛羸顛劉
蹶都草草黃腸便房跡如掃海東地接田橫島毅魄英風倘
相保

曉過圯橋

前村晨雞喔喔鳴枝頭宿鳥拍拍驚雞聲鳥影兩闌寂落月
樹梢時一明征車輾輾塵生軌照眼依稀板橋水虎嘯人亡
往事非臨風約略雲波詭欲問東城黃石公榛煙莎草劇濛
濛素書莫讀陰符秘太息蕭條徐泗空

清江浦

清河一小邑南北爲通津閭閻雜鰕菜菰井亂雞豚杉屋不
盈丈戢戢如排鱗面河列厖肆匝岍羅蹻輪我來朔風厲哀
此鳩戶貧昌披婦子服欹倒蓬蒿門父老集二三爲言水患
頻茨防一不慎命與魚鼉鄰嘗攷水工言河淮流本分及茲
會入海故道垂千春自從前明來東南漕粟勤爰復會通河
長隄葺歸仁障淮出清口勢與河吐吞借淮刷黃流不使波

奔渾轉漕旣源源歸墟亦汙汙淮河兩不害輪輓相因循一朝周橋開淮水皆東淪濁清力不敵沙壅淤海濱逆流入此浦吼怒驕波臣挾淮走洪澤蕩決無厓垠高寶爲下流范公隄久湮桃花春漲起千里波粼粼菱蘆歲頻歛邪許動萬羣增土但保隄孰爲究其原東望雲梯關滄瀛欲揚塵西眺高堰工岌岌臨城闌處堂紛燕雀蕩析愁朝昏陽侯何足怪毋乃苦淮民兀立西日斜烏鳶敗蘆蹲作詩不辭拙願問防河人

淮安二首

月波樓下楚州屯處處風閒檠戟門輓粒崔昂開邸閣算鞭劉晏課牢盆黃旗青雀河師舫翠闌紅螺賈客樽不道艱難求一飯市頭還有漢王孫

沈玉舉菱傍大河荻苗秋水漲洪波將軍日下洪園竹過客
空吟瓠子歌泉府頻煩廢貨貝蒼生真恐化鼃鼃諸公賞莫
膺焦爛一帶邊淮稻蟹多

河魚歎

白白河魚濶盈尺掉尾揚鰭足膏液掀波又得誇漁夫賤直
攜來飽行客向時河伯大肆威傍河居民獲免稀死者已矣
生乏食殘黎瘦盡魚獨肥老饕七箸不遑恤往往毒淫成腹
疾我寧舍之啖薇蕨纖鱗中有蒼生骨

賣馬行

并序

舟次維揚斧資告匱予攜有二馬係得自塞外者乘之有年
矣及此遂減價售之馭人以供旅費作賣馬行
廣陵門外人如織牽馬市頭問馬直金珂玉勒不被體風鬣

霧鬣無顏色憶從渥注聯轡來黃驄紫燕非凡材慣踏層冰
陵雁磧幾驅朔雪眺龍堆轎人一唱東歸引欲別驂驪良不
忍欸段還思下澤遊鄉程先仗霜號緊并州已過歷齊州耳
帽蕉衫穩上頭有約衡門飽場藿不教塵土走長楸寒雲慘
澹淮南道卻顧囊錢空似掃已無白飯養諸奴那辦青芻充
馬草關河相對愁心顏山程水驛多間關安望越裝分陸賈
直須駱馬嚙香山脫付青絲馭人手論價還看步工否故將
醜語詆權奇忍使吞聲伍衰朽得錢便可作歸資多寡安能
重致詞從來失路身多賤此後鞭笞吾豈知馬聲鳴咽人聲
遠彳亍河干日將晚莫憶春燕射雉場莫提淺水呼鷹坂只
合歸營二頃田飯牛扣角過年年綠楊陰裏誰家子叱撥呼
風試錦韉

廣陵曲

錦作長隄香作市九陌浮埃蕩煙紫八代文章廢選樓一溝
漕路徵盲史吳公臺畔波粼粼三十六封書惱人楊家阿麼
定何物萬古畱此風花春狎客名倡盈劇郡珠衣祿節誇嬌
韻夢喚司勛白日歌杯傾叔寶紅梁醞別有桑羊擅豪貴華
轂蘭舟開如沸紅女生無蠶績課傭奴亦識金銀氣南部煙
花醉不醒廬陵玉局返瑤京夜來鶴背三分月可有仙翁太
息聲

平山堂

平山三過憶髯蘇彈指光陰事有無壁上龍蛇渾昨日眼中
花月笑今吾波熬積雪研桑業簾卷珍珠士女圖一種醯雞
成底事轉頭真欲問毘盧

史閣部祠

鐵礮摧城弔國殤
衣冠畱墓拜堂堂
夷吾自灑新亭淚
江總仍飛曲院觴
半壁山河撐赤手
九霄箕尾落寒芒
燐光都在梅花嶺
披髮依稀下大荒

舟夜

笙清簫暖忘宵涼
羅綺迴舟水亦香
一掬人間娥月影
受降城畔獨如霜

次吳門作

長鋏雞冠氣未摧
十年居近李陵臺
行滕帶得樓蘭劍
徑向要離冢上來

抵里門

十載聽殘勅勒歌
鳩車竹馬夢蹉跎
入門生被羣兒笑
吳語

零星記不多

藥闌

藥闌曲曲繞筠廊記得兒時舊納涼
今日文章成結習逢人先問讀書堂

冬日雜感六首

林棲感元象二曜無畱光況乃塵中軫勞勞各啾蹙浮生寄
稗粟敢云歸故鄉墜葉從迴颺偶落根株旁南垞竹休種北
堂琴莫張試看林際鳥覓粒仍高翔

參差丹穴鳳容與女牀驚羽儀自湛澹理翮愛修翰翕忽儕
鴻鵠芒芒隨逝瀾庶情任耳食時尙昧遐觀衆鳥各聳聳靈
禽良獨難

夙尙慕漢陰機心未能慣妍媸本定形轉輾淆真贗傲月乃

珠胎笑鵬在籬鴟單慧惑汎剝執古生憂患探原理有恒入
世事多謾吞刀與吐火此術非爲幻安得謝埃竭孤芳擷瑤
澗

嚴霜隕衆色歲宴時旣昏櫺櫳感嘉蔭標籥自煩寃向榮貴
乘運應候美斯存長養一失節叢駢誰復論

中澤撫芳蕙所思在海潯美人隔閭闔耿耿馨香心微燧自
滋露白雲終杳深鼓蒲並攢蔣日夕愁相侵浩唱妃豳詠淒
然還故林

單襄當鑄幣圖法論固宜太史序貨殖意激聊陳詞讀書非
學賈奈何競刀錐歷世慨微抱得情還自嗤商山有芝朮采
采無窮時

春暮述懷四首

戊申

墟里蕭疎枕逝川春光晴轉海東偏
風清燕雀凌晨舉潮落魚龍逼夜遷
井稅關心西瀼屋烽煙迴首八閩天
傳聞溟渤鯨波靖正下戈樓百丈船

削木潢池溯九秋鯨鯢多厘杞人憂
虛循跋扈吹脣衆宗慙艱難破浪舟
輓粟牙檣催赤棒刺船身手覓黃頭
清時軍費徵求易未用春陵賦道州

樓船王濬一江分玉帳鏐歌夾道聞
先遣營前收債帥直從天上落將軍
鮫宮涎長降幡出鼉背煙開賊壘焚
容易渠魁單騎馘土人齊拜李摩雲

爰書罪狀議元戎養患誰論血戰功
窮寇已俘徐道覆大勲專屬寶安豐
好求清節懸魚吏永臥高墉射隼弓
白浪不驚燐火息一樽籬落醉東風

北郭二首

一鏡浸寒綠，扁舟破水煙。遠村圍樹密，柔艣劃波圓。撈蟹茅
支舍分畦竹，引泉買山吾意決。家近卜鄰便。
岼花時一落汀，樹曲逾深斜日竹。間墮微風川半陰，邛園終
畝計湖海。倦遊心寄語天隨子，無爲久陸沈。

無題八首

上清曾與訂葳蕤，甲煎香浮罷采芝。風度紫簫都入破，骨安
紅豆最相思。鳳團碾片新涼後，蠟淚成堆夜淺時。祗道銀河
無路隔，撥雲蘭漿渡流澌。
倦客寒氈獨下關，落痕空砌雨斑斑。青梅綠葉飄零裏，碧杜
紅蕖想像間。弱綫有文傳手跡，強臺無路覩眉山。蓬萊咫尺
神風引，虛向雙成問阿環。

杏梁春暖畫檐層輪爾穿簾燕子登曾愛新詩籠翠袖可無
才語鬪青綾淡浮銀漢娟娟月明點霜羅耿耿鐙怪底看朱
動成碧豔情愁緒兩難勝

銀鴨香殘火漸消謝孃眉嫵沈郎腰一雙瑤爵虛三盞五十
冰絲厭六么濃雨苞仍含豆蔻嫩風心不展芭蕉年來笑口
渾難啓孤負蓮花玉女驍

憶昨涼蟾透碧紗春風吹枕忽天涯芙蓉帳小邊鸞畫鸚鵡
籠低史鳳家鬢影衣香歸夢幻醉魂吟魄繞鐙花東皇消息
渾依舊又是蚪檐斗柄斜

望仙樓上望橫波碎佩叢鈴隱約過畫月闌干釵股細呵簣
笙管口脂多虛煩錦幄三千拜誰占濃春十二窩無價韶華
校樣擲翠深紅隙奈卿何

駐馬楊林試問途
蘅皋人去杳平蕪
蕙情託賦摹元叔
山影橫江望小姑
生長華鬢原色界
隔層香霧便清都
癡頑賸作飛仙想
太白梁清事有無

九陌垂楊色未勻
早鶯啼徹翠帷春
璇臺自有飛瓊座
湘浦虛勞解佩人
蓮漏淒涼吟昔昔
彩綃婀娜喚真真
鄂君繡被薰都嬾
盼斷新來笑與顰

析居

補屋檐牙做茅柴
已索絢但須防燥溼
不厭破蓬蒿裝薄
檐囊易書多插架
勞迴看舊松菊三
徑劇蕭騷

新屋

誰言居不易此地
足桑麻近市小人
宅清名廉吏家富
憑歸北阮寒未累
西華老圃差堪羨
長鑱學種瓜

郊行二首

客思縈紆野岸長，筍輿清曉促朝陽。
紅林烏柏殘冬路，淺水平橋昨夜霜。
地脉垂瀛畱壯縣，天風吹海感枯桑。
休言斥鹵無收穫，臘酒農家已築場。

東南地盡白雲邊，百雉州城鎖野煙。
湖口朦朧通各島，村墟溝澮貫千川。
頻年玉粒供輸易，在昔金湯組練先。
表餌尙煩籌海策，伏波休便廢銅船。

閒居漫興十二首

巳酉

地近蓬瀛白浪通，拍村新漲撼青銅。
雲奇忽作鯤鵬翼，野曠時來鸛鶴風。
入漢何人占在斗，望洋有氣吐如虹。
無因去約宗元幹，手挂扶桑兩石弓。

水國東偏一墨莊，綠槐高映讀書堂。
到門客任題凡鳥，作尉

吾真笑爛羊冷耐柴桑宮五畝雄拚劉墮酒千場無端觸撥
狂奴態又引豪情到白狼

壯遊前夢斷樓蘭落拓江鄉王子安少日關山揮手易春來
花鳥賞心難芙蓉華鏑三千丈風雨秦松五十盤欲駕青蚪
上瑤圃崔巍虛負切雲冠

醯雞尺鯉事云何一曲南山耳熱歌鸚鵡聲華前自誤鯽魚
名士近尤多強宗靜笑當門薤空谷寒寒補屋蘿千載靈修
隔江水通詞直欲託微波

田翁社釀且同傾月旦憑他里黨名喚作酒人應識我便推
詞客豈干卿狂瀾學海今誰挽碁局中心恐未平莫怪殲唐
筵上客寸心行共野鷗盟

授策橫經比塾同毛錐得失感鷄蟲青山遺老憐頭白丹訣

旁門鬪焰紅折角敢輕摧五鹿貪書人自笑丁鴻爭雄無幟
談無塵此事還應讓乃公

楚騷漢樂費覃思閒做鍾嶸自品詩俊侶罷參清月社心香
孤蕤浣花祠十年面壁愁乾慧一輩傳箋笑論癡徑欲求才
到芒屨此中或有呂徽之

啓口紛綸問具敖願魚無網劇勞勞誰從和仲求犀角謬向
超宗覓鳳毛坐霧書生千日醉笑人星宿九天高商量攜取
金龜酒獨上神山釣六鰲

黃金揮盡漢朱家尙有君雲義足誇相和更無林際鶴自尊
何怪井中蛙低眉吳市簫傳曲放眼平原劍吐花算是長鑱
還計得青門今種邵平瓜

漠漠苔花上綺寮杜門無計避塵囂喜從野寺尋僧紹間草

狂文續孝標夢裏何心蕉覆鹿客來須恕口呼貓香蘭尙愛
當門守日日斜陽抱甕澆

衡門菽水蓼猶甘落落清風蔣徑三懸樹荆鞭仙欲笑送窮
桃李鬼寧諳狂懷徐邈時中聖故態朱公任長男蠟屐一生
穿幾兩聽鸛且爲置雙柑

散人休道絕弓旌風味居然傲上卿文苑晝曾題九錫槐宮
宵自擁連城看花章奏通明殿插棘籬開細柳營如此頭銜
原不賤放教天爵屬狂生

擬新樂府六首

并序

予素不喜擬古歌辭以其句摹字倣有宗法而無生氣蹈前
明王李諸公故轍也顧獨愛樂天文昌仲初諸新樂府比事
類情長於諷喻足爲虞箴原誦繼聲暇時偶有聞見輒效爲

之塵得六首中間或弔詭其辭要取言者無罪聞者足戒若
以爲元叔嫉邪劉四罵人則吾豈敢

長官壽

長官壽長官不自壽僚吏相爲壽酒不必東海珍脯不必西
方麟添籌有物在囊橐安用祝予千萬春門前賀客會堂上
笙歌沸百酌醉不辭三更歇猶未是時歲闌天雨雪鄉亭屢
報溝中瘠

當關僕

睥其目瞞其腹狐裘貂冠尾禿速一刺價值千鍾粟身是貴
官親信僕貴官如神天上坐卑官如鬼候門左以鬼見神勢
本難況有虎豹常當關虎豹當關差勝若不爲錢刀濟其惡

浚河渠

日者府帖下云道浚河渠田夫任力役業主任蠲輸朝擔五斗泥暮去一尺土岸頭鑿鑿催大鼓赤日行天汗如雨華興翠蓋何雄豪沿隄鞭扑聲嗷嘈近來官長多嫻事不論農桑論水利吾昨扁舟葦舸過沙深水淺奈膠何舟人指點向予道此是今年新浚河

輸租樂

輸租樂農人不樂士人樂二頃不須田負郭卻向太倉充鼠雀杳矣均田圖茫然手實法某乙租庸移某甲勢與長吏相傾壓長吏無如何逋布疊疊多公私各有利遑復相譙訶獨不見農夫擔負官倉口顆粒何能角升斗多寡一任量人手遺秉滯穗皆入官鳩形婦子吞聲還

讀書堂

曉升讀書堂時藝滿屋角諸生口嘈嘈師長面嶽嶽經史子
集束高閣別有真傳博人爵曷不飛去生處樂胡爲東塗西
抹高著眼七略九流自纏縛舉秀才不知書察孝廉父別居
西京取士已如是何況區區較文字

賣菜傭

生不願交賣菜傭寸絲尺粟親緘封生不願交賈人子百歲
心思在包匭十萬一紫標百萬一黃榜李核須鑽簾須障子
母兼權較銖兩世無梁伯鸞自熱不成爨世無季布諾誰爲
救急難不如去逐韓嫣流黃金尙肯輕爲彈

學山園遺址觀荷花

夜夢西嶽遊蓮花峰頂坐朝來理輕策池上看猗儺嶽尖萬
朶青芙蓉一一化作陵波紅方池尙隔三數里先遣鼻觀通

香風茭蘆鷓鴣相勾引眩目明霞萬千本遠牽荇帶隨陽敲
近護落錢貼隘穩鮫宮仙人絳羅襦冰雪作骨蘋玉膚紅雲
下蒸香汗溼翠葢捧出傾城姝涼颼忽向青蘋起清漣皺綠
霞裳靡的的分明羅襪塵盈盈只隔秋水嗟哉憐此十頃
荷曷不亭子開鷗波薜蘿誰使泣無主荒郊蔓草薶煙蘿老
輩淒涼向人說學山園昔稱奇絕四照曾圍窈窕窗木蘭兼
有蓮舟設當時黨魁誰最尊名流都出平原門十年誰敢收
張儉一飯亦解哀王孫疊石爲園面環翠上客三千此中醉
萬顯明珠護綠雲平波不動秋香媚自從運甌黃楊閨珠履
堂前散英雋一年寥落一年殯百廿年中賸灰燼祇餘滑笏
水蔚藍劫火畱此蓮花潭路人歎息蓮花笑鶴唳猿嘯漫憑
弔君不見平泉梓澤鎖寒煙我輩踈狂劇放顛典盡秋衣貧

不覺癡腸猶盼買山錢

送女弟湘蘅歸吳興

朔風吹雪滿林端詠絮人今事伯鸞營帳也應憐父老調羹
先要博姑歡奩清書卷裝仍薄族大賢名得倍難好等柳花
桃葉候歸寧重認舊門闌

再示女弟

慘澹慈帷閉不開北堂先抱蓼莪哀九原同灑皋魚淚百兩
愁迎弄玉臺揮手但然三夜燭頌椒須晦一分才大雷他日
書能報尺素頻煩走僦來

月

不分飛明鏡團圓樂溟海東憐他九霄上照我百憂中氣欲天
風引呼應帝座通太清無點綴心地愧虛空

詠史四首 庚戌

徼外鄙君蒞天南太白懸枕戈劉越石聚米馬文淵
毳帳蒼梧雨雲旗八桂煙存邛長卿志不畏墮飛鳶

惻愴申胥淚艱難象主身六師開瘴癘一戰定君臣
瓔珞婆羅舞山花吉貝春曾聞班定遠特許畫麒麟

漏網驚妖鳥旋看鼓翼升遺黎鬪蠻觸新戶走其滕
高子盟何望無虧戍漫增罷師非息戰毒霧正炎蒸

大長單車走元龜琛獻恭似聞刑白馬不用謝黃龍
兼弱天心定輪誠漢法容越王城畔路長撤戍樓烽

小病

未擬踈書卷差堪謝友朋獨兒自嘲哂鼠子任飛騰
倦眼花成霧閒房味過僧羨人如健鶻原上臂秋鷹

田家

疎籬生暝色出屋倚柴關
煙際一臺笠東原人已還
白雲點秋霄有意無意間
嫵媚溪上月媚此蛾眉彎
鄉里足娛日休言井稅艱
長當謝湖海力穡耕南山
南山亦可耕憂此水旱難
水旱亦偶爾征稅事多端
吾儕生治世箕斗不須歎
勿盼蠲輸屢勿覲鞭扑寬
但得早完賦催科皆好官
蠶頭新籩酒聊博餘年歡

放鶴詞

碧空澄澄露華冷健掣霜毛去
緱嶺逋翁望斷沈寥天祗賸
一繩秋鴈影人間糧料何爲哉
定知笳羽非仙才梯飈羨爾
瞰滄海珠樹月明歸去來

文姬歸漢圖三首

路出祁連塞草寒兩雛拋去返呼韓紅顏別有傷心事莫與
蘇卿一例看

明妃豕接烏孫路又送文姬萬里還看盡往來人似玉無情
最是絃千山

茫茫家國萬愁來有幾蛾眉絕域同一種英雄輸女子月明
揮淚李陵臺

廣小遊仙三十首

倒景金門詆蕩空排闥宵半趁罡風十花徧照樽桑木地蓋
星衢一色紅

九關虎豹屹重重瑤水鴻天歛步容我是童初散都吏玉冠
休認碧芙蓉

櫛櫛銀雲擁翠幢通明殿裏曉鐘撞外臣記得朝天節不敢

迴頭玉女窗

薰香齊拜九華芝十八班心見百司
恰值騎鯨狂太白退朝先索步虛詞

準擬排空徧九圍異書先與訪靈威
洞庭波浪連天遠要乞花龍送我歸

風姨青女笑相於月地雲階玉不如
徐步丁寧天路穩畫輪休碾阿香車

玉檢金泥出上都諭檄給札到狂夫
分陰好趣壺中日細按真靈位業圖

聖隆梵度手標題三十王天號不齊
忽展黃繩案行國方言重爲補撐犁

小篆雲書鳳字牌斗牛宮闕闕瑤階
紅塵大有衝霄氣誰把

豐城古劒藴

廣寒清宴啓樽罍奎壁羣英雜沓來自向元都數人物此中
真有投天才

玉樓摧摧會羣真長爪奚囊古錦新畢竟憐才推帝府修文
畱待嘔心人

仙樂玲瓏過耳聞瑤京身任往來雲白榆不隔黃姑路只礙
紅牆一道分

天台鶴馭訪山樊洞口春張怯夜幃我亦生身兜率界桃花
紅處便停軒

龍劒雌雄出匣寒隱巖持贈有雙丸夜涼月白西風緊瀉向
銀河影裏看

飛瓊侍史蘭香女又見雙成與阿環遇著玉卮孃一笑春風

小字滿人間

路入銀潢渺水煙流黃機上自年年玉清也有催逋吏未許
天孫貸聘錢

山香小隊譜雲韶衣藝都梁頰暈潮分與人間愁萬斛珍珠
如雨撒鮫綃

句曲彎環石磴包良常高處訪三茅洞門不用闔翁守竹杖
挑雲自在敲

堆槃雪藕間冰桃小宴瑤池月正高貪得鷺鴻肴佐酒不須
剗髓借蘆刀

七澤三湘跨鶴過洛川人遠隔微波迴頭滄海情瀾瀾飛控
雲車度愛河

芙蓉鶴氅受風斜擘脯仙人走鈿車徑欲煩他纖指爪碧雲

深處撒胡麻

善水香園問務光天魔旁瞰劇披猖如何不講流鈴法却授
丹經點石方

是非不用說三彭官府神仙色色清只有護花心事在綠章
千遍叩通明

玉案珠簾翡翠屏蓉城花霧闕娉婷人間翠被寒多少莫遣
笙簫弭節聽

鯨魚跋浪水層層方丈飛車試一登上得三山最高頂坐拈
花片打鯢鵬

忽解霞裾上釣舟武陵溪水碧於油山田不起青苗例飽飯
桃花過一秋

朱弦獨拊寫秋心月落江空調轉深不是成連來握手海天

何處覓知音

鴻寶親從枕畔探驕王禮數感淮南爲言都厠三年謫雞犬
歸來也抱慙

夜摩忉利氣清嚴癡癡移家問史詹報道圓靈無著處玉樓
齊下水晶簾

丹籀空將姓氏嵌散人還我舊頭銜金庭芝草年年長準備
鉏雲白木鐙

小謨觴館詩集卷二